



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DLXXVII. ad annum DXC.

Parisiis, 1644

Epistola LXXV. Gregorii Papae I. Ad Episcopos Nvmidiae. Vt nullum ex
Donatistis ordinet.

urn:nbn:de:hbz:466:1-15221

gloriæ commendamus, quatenus ei quæ necessaria fuerint salua iustitia tribuatis. Oro autem Dominum, quo vitam vestram in omni bono custodiat, actusque vestros misericordiæ suæ dono disponat.

EPISTOLA LXXV.

GREGORII PAPÆ I.

AD EPISCOPOS NUMIDIÆ.

Vt nullum ex Donatistis ordinent.

Gregorius vniuersis episcopis Numidiæ.

Grat. dist.
12. c. con-
suetudinē.
luc. ep. 65.

Si quando, carissimi in Christo fratres, inter virentes segetes zizaniorum quædam se infert importuna commixtio, hanc radicitus necesse est cultoris manus adimat, ne futurus fecundæ segetis fructus possit intercipi. Et nos ergo, qui licet indigni dominici agri culturam suscepimus, ab omni zizaniorum scandalo ingenuam reddere segetem festinamus, quatenus ager Domini reditu abundantiori fructificet. Petiistis etenim per Hilarium chartularium nostrum, a beatæ memoriæ prædecessore nostro, vt omnes vobis retro temporum consuetudines seruarentur, quas a beati Petri apostolorum principis ordinationum initiis hætenus vetustas longa seruauit. Et nos quidem iuxta seriem relationis * vestræ, consuetudinem, quæ tamen contra fidem catholicam nihil vsurpare dignoscitur, * immotam permanere concedimus, siue de primatibus constituendis, ceterisque capitulis, exceptis his qui ex Donatistis ad episcopatum perueniunt, quos prouehi ad primatus dignitatem, etiam cum ordo clericorum eos ad locum eundem deferat, modis omnibus prohibemus. Sufficiat autem illis commissæ sibi plebis tantummodo curam gerere: non autem etiam illos antistites, quos catholica fides in ecclesiæ sinu & edocuit & genuit ad obtinendum culmen primatus anteire. Vos ergo, fratres carissimi, admonitiones nostras zelo caritatis dominicæ præuenite, scientes quod districtus iudex ad examinandum deducturus est cuncta quæ gerimus, & vnumquemque nostrum non ex prerogatiua sublimioris gradus, sed ex operum meritis approbabit. Quæso ergo, vosmetipsos inuicem alterna pace diligite in Christo, &

hæreticis vel inimicis ecclesiæ vno cordis intuitu obuiate. De proximorum animabus estote solliciti, ad fidem quos valetis prædicatione caritatis, prætenso etiam terrore futuri iudicii, suadete: quoniam pastores constituti estis, & Dominus gregum ab iis quibus commisit pastoribus fructum multiplicati gregis expectat. Qui si proprii gregis augmentum adhibito studio diligentiori prospexerit, multiplicibus profecto vos cælestis regni muneribus decorabit. Persolvens præterea fraternæ dilectionis alioquium, oro Dominum, qui nos animarum pastores, quos elegit, ante se dignos efficiat: sed hic actus nostros, quos in futura vita digne suscipiat, ipse disponat.

EPISTOLA LXXVI.

GREGORII PAPÆ I.

AD LEONEM EPISCOPVM IN CORSICA.

Visitationem iniungit * Aleriensis ecclesiæ.

*Gregorius Leoni episcopo in Corsica.** al. Sa-
gonen-
ti* al. Sa-
gonen-
tem* al. dif-
positio-
ne

PASTORALIS nos cura constringit ecclesiæ sacerdotis moderamine destitutæ sollicita consideratione concurrere. Et quoniam ecclesiam * Alerensem ante annos plurimos, obeunte eius pontifice, omnino destitutam agnouimus, fraternitati tuæ visitationis eius operam duximus iniungendam, quatenus tuis dispositionibus eius possit utilitas propagari. In qua etiam ecclesia vel eius parochiis, diaconos atque presbyteros tibi concedimus ordinandi licentiam. De quibus tamen tui sit studii diligentius perscrutari, ut eorum personæ a sacris nullo modo Canonibus respuantur. Sed quos fraternitas tua tanto dignos ministerio perspexerit, eorumque mores & actus huic ordinationi concordare cognouerit, eos auctoritatis nostræ permissione ad prædictum promoueat licenter officium. Cunctis igitur rebus superscriptæ ecclesiæ ut proprium te volumus uti pontificem, usque ad secundam nostram epistolam. Ita ergo in omnibus his diligens esto ac sollicitus, ut tua * dispensatione utilitates ecclesiasticæ salubriter modis omnibus Deo valeant auctore disponi.

Concil. Tom. 13.

Gg ij